


Lukasi

Bo Lhaaũ Lukasiaa andigkaakhe'
(Sura 14-19)



Lukasi

Bo Lhaaũ Lukasiaa andigkaakhe'
(Sura 14-19)

Injili kama ilivyoandikwa na

Luka

(Sura 14-19)

katika lugha ya Kisandawe

Wycliffe Bible Translators



Pamoja na
Huduma ya Kutafsiri Biblia
na Kuendeleza Lugha ya Kisandawe

S.L.P. 1369

Dodoma

Lukasi

Bo Lhaaũ Lukasiaa andigkaakhe'
(Sura 14-19)

Gospel of Luke

(Chapters 14-19)

in the Sandawe language of Tanzania

Toleo la Kwanza
2016

Mchoro kwenye jalada umechorwa na Kenny Woodrow
© 2013 Wycliffe Bible Translators, Inc.
Mchoraji wa mchoro mingine ni Anselmi Dominik Affa, Ilasee.
Imetumika kwa ruhusa.

Ramani © 2016 Wycliffe Bible Translators, Inc.

© 2016 Wycliffe Bible Translators, Inc.

Lukasi

Sabadto-nqēts'i bpona'ō Yesū meenaa

14 ¹ Sabadto-nqe ts'ekhets'i, Yesū bpaā Farisayogkimee ba'ese ts'ekhe-ts'aanaa mantcha mantchasana hik'i. Hia koodtaa iei', Farisayōsō nī hinsogki ura' neē Yesūts'i c'ee hotcoo ncweei'ōts'i. ² Nī Yesū'ō, ncemeseē ts'ekhe gkoose, swaagku-k'waoose. ³ Yesū bpaā Farisayōso nī sheria-mwalimūsots'a xagkats'a, "Are sheriana meenaakhisūnaa Sabadto-nqēts'i ncomoso bpona'ō, khare meenaakhisūtchee?" ⁴ Hesosi' aa qhamu. Yesū bpaā hewe k'wawesēga dzaats'ē nīgā bponaee, bpaā ikha bogkwee gka', ts'aanagkwa kwaa.

⁵ O'si' Yesū bpaā ikha bokhi'ī, "Hona sīdtatche, hia Sabadto-nqēts'a ^a hewe-nxowē au hewe-humbuaa x'ādtanaa q'awei', ts'ekhenasāts'i dtugkeeits'eā?"

⁶ Ncomosōso heso aa bots'ēgkia' k'waamaa.

X'agkugkuts'i'ōdtanaēts'i somasugku'ō

⁷ Yesū hia ca'ī gkulalise'īdtosōso aa neē ba'ewase-qwaa'a malhei', bpaā adisia bokhi'ī, gkiagka', ⁸ "Hia ncemeseēaa hedtegka-gōnaa gkulalisebpoi', meegko ba'ewase-qwaats'i hik'ī ie. Meegko ikhi ncwee, dime

^a **14:5 hewe-nxowe.** Qwaā hewets'i Girikigi'ī andigkoo hingekhedta ikha' gka', *hewe-dak'wee.*

dtegi gkoose gkoo gkulaliseedtō habpu'ōtche ba'esē.
⁹ Nī haau sī gkisosīsi gkulalisesīsē cī ikhi bokhibpoi
 gka', Habpu heeu qwaā heeugkimeegko bikee. O'si'
 mure nqabpoi, bpii haangā hik'ī nī dlo'i iebpo.

¹⁰ Hewegkimee hia' gkulalisebpoi', hik'igkō dlo'i ie,
 bpaā habpu gkulalisebposēgaa cī ikhi bokhibpo gka',
 Ware, cigkō ondte dtaangki ie, qwaā lhawetee gkoose.
 O'si' uri manasibpo cāts'ibpo haaso hesokhigkisīgaa
 neesōso'ō. ¹¹ Hewegkimee, ncemesee ba'ese
 ncwets'isē, Warangee x'agkugkeei nī x'agkugkuts'isē,
 Warangee gkongo'seei."

¹² O'si' Yesū bpaā haau gkulalisesēts'a gka', "Hii
 ncomosoi mantchanai gkulalise'īgi', k'imeedtē au
 dtets'i golobanele'ei', meegko habpu-maamaā, haa
 dogodogō haa habpu beeba benegeēsots'i gkulalise.
 Hii ncomoso hewe lhak'āgi gkulalisimaai', hesogki laba
 ncaadtī gkulalisebposo heso-ts'aana, nī ikhisi'
 kwamseekhibposo udtaa habpaa ncuncu'waats'i'īkhē.

¹³ Bpaā tcūsi' heso-qwaāna heesots'igko gkulalise,
 mutugū, gkoonawats'iwasē nī c'eewasets'ē. ¹⁴ O'si'
 mamaase habpuna, hesosi'ts'ene gkulalisē
 kwamseekhibposats'i daasots'ei'. Bpaā tcūsi'
 Warangee kwamseekhibpoi, heweaa ncomoso hewe-
 cweena lhaasōsoa lha'dtewasedtatchea c'eegku'īsi'."

**Ncomoso meekhi'a' Warangee tl'ee hia hewe-
 ba'oōdtanaa gkulalise'īgi'**

¹⁵ Ts'ekhē haaso mantchadta neesisōsodtatche hia
 Yesu-bokhēts'a ke'ei', bpaā ikha bogkwee, "Mamaase
 haau Warangee-ba'oōdta mantcha'ō qwaā q'oowesē."

¹⁶ Yesū bpaā adisia dteeyegkwe, “Ncemesee ts’ekhe gkoose, bpaā sigkugku meea ncu’waã nīgā ncomoso deeteesoa gkulalise’ĩ. ¹⁷ Hia mantchats’e saāgaa nxeei’, bpaā hewe-pagadzieea kinsee haaso gkulalise’ĩdtosōso tchiaso bori’ĩsanaa, nĩ bokhi’ĩgi gka’, Ncadtigkwe, magkaa tchia tlemso gkwee!

¹⁸ Bpaā tcūsi’ heso tchiaso gkulalise’ĩdtosōso, aa ts’ekhitsu’ekhia’ nqwanets’i. Haau baarasats’iē bpaā ikha bogkwee, Mindasi dlomoo, swe dtidtee hik’ĩ dtakhi cāsi. Nqwanebposi nxeesits’e. ¹⁹ Dtēgki bpaā ikha bo, Lhomoo-humbu 10si dlomma, nĩ swe hik’ĩ x’weewagkaasi. Nqwanebposi nxeesits’e. ²⁰ Bpakhi dtēgkiaa gka’, Swe beebanasi hedtegka, hewegkimee daasits’e cisats’i.

²¹ Haau pagadzieē bpaā kwaã nīgā tchiaa bo’waagkwe hewe-ba’esēga. O’si’ ba’esē bpaā k’itl’e, bpaā ikha bogkwee hewe-pagadzieēga, gkiagka’, Lhibedtenagko hik’i xoo ba’esēna nĩ xooxookhē mjidta neesekhēna, nigkō mutugū, gkoonawats’iwasē nĩ c’eewasets’ekhē ona tl’aa’ĩ ci.

²² Yoo, pagadzieē hewe bpaā kwaa ci, bpaā ikha bogkwee, Ba’ese, haakhwe habpaa bo’waakhisekhē tchiasi ncuncu’waa, bpaā ikhigkisi’, xookhi hinsogkimeegki qwaasi’.

²³ Ba’esē bpaā pagadzieēga ikha bogkwee, Hewe’si’ hik’igko mjĩ-bpeerana, xoo ba’esēna nĩ xooxookhē gkidzidzinakhē nĩ mindadtana ni’sekhēna, nigkō ncomoso mama’simaa aa tci-ts’aana ncadi, gkwaa dtelha tci-koōgaa qōts’i. ²⁴ Araasi bokhisĩ gkisi,

ts'ekhegki haaso dtaangki gkulalise'ĩdtosōsodtache tci-sigkugku tomingeets'e."

Yesu x'aa'ō-hogorĩ

²⁵ Ncomoso-gumbe meeaa Yesūga' neē x'aa. Yesū bpaā k'eets'a ikha bokhi'ĩ, ²⁶ "Ncemeseē tcix'ana ciiā, hia tci uri meenasetchee' hewe-dtadtā'ōtche, mesū, ncumusū, hewe-nxogkō, dogō makhā nĩ tametchĩ, nĩ hewe-dturudtā'ōtchegekii', tci x'aasesats'i daaits'e.

²⁷ Nĩ ncemeseē tci x'aase'ōgkimee mak'oō hewena ncdatiikhē meenawaatcheeā, ^a tci x'aasesats'i daaits'e.

²⁸ Swe adisi'ĩge boowe. Ikho' bo, sīdtatche ^b koo uri mee tlinesagkimeea. Dtelha dtakhi tline baaraaits'e dtanā haagkits'ĩ koō hewe tchiats'i tline'ĩ hogorĩ ha'amgke'ō manaatcheets'i. Hia ikha ncweei', hiisii manaai peesaā tleegkaawai'ō tlinē tlemse'ōna. ²⁹ Hia ikhi ncweetchee', tline'ō baaraayooi bpaā dtoots'ugkuwaā remaai, aa ncomoso tchiaso cāsisōso nqeenqawaaso, ³⁰ ikhi bō gkia'gka', Heeu ncemeseē tline'ōga baaraa, bpaā dtoots'ugkuwaāgaa remaa!

³¹ Do'ee adisi dtegi boowekhisĩ. Wafalme gkisosoa x'āgkisagkimeea'. Ts'ekhē x'āgki-ncomoso 10,000wase dtidtee, dtēgki 20,000wase. Haau x'āgki-ncomoso maa'dtawasē dtanā gwesegai hia remaasats'i daai', hiingo x'āgki-ncomoso 20,000wasets'i. ³² Hia cā bpaā

^a **14:27** Qwaā hewets'i Girikigi'ĩ ikha' andigkaa gka', hewe-khokhosoogkimee teēgkwa dtwarā nqetchia x'aase.

^b **14:28 koo uri mee.** Qwaā hewets'i Girikigi'ĩ ikha' andigkaa gka', mnara magandzase.

daaits'e'i', ts'ekhenasāts'i hewe-ncomoso kisimsimaai, aa ni'so hiingo mfalmē dtēx'ana xookhia itaa iesi', nī bogkweeso aa eegkwāgkiso.

³³ Ikhiga' sīgki, sīdtatche ts'ekhegki tlaagki, tci x'aasesats'i daaiā hia hewex'a'khē tchia bikimaatchei'.

Yesu-x'aaisōso uulhii lhaaūkhe'ts'igkwa'

³⁴ Uulhii magkaa uri lhaweteega'. Bpaa tcūsi' hia gkoonawats'ii', daats'iits'e tl'eseē hewe-tl'wee'ō kwaase'ōts'i. ³⁵ Heeu uulhiī lhaweits'e tl'eseē mehēts'igki, masangats'igkiwa'ā nī ts'iinkwats'igki, ncomoso siē dtakhi ku'seeso. Gkegkewasē, ke'egkwa!"

Indza lhagka'sē-adisi

15 ¹ Nqe ts'ekhe, kodi-xhēgkuisisōso nī hinsōso khwalhe'waīso aa tchiasoaa Yesūx'ana' ncaadi ke'egkwesana'. ² Bpaa tcūsi', Farisayōso nī sheriamwalimūso aa biawasi ni'ā gka', "Ncemeseē heeu khwalhe'waikhigkigesoaa isi korats'i, nī tl'eseēgki hesokhigkiaa mantcha."

³ Hewe'gaa Yesū adisia boowekhi'ĩ gka', ⁴ "Swe sīdta ncemeseē indza 100wasewa', hia c'ee gkwaa indza ts'ekhisuaa lhagka'ai', hotcoo ncweei? Are haakhwe 99ā baloodta bikimaā hik'iits'e k'anqasusūsuts'i itchayoō q'oowe'ōna? ⁵ Hia q'oowesui', gkwaina dtwaraasui meenats'i'ĩ. ⁶ Hia ts'aagkua nxeei', bpaa hewe-maamaakhī nī hewe-koo'ō beebasōso haqa'ĩ nī ikhi bokhi'ĩgi, gka', Meenats'i'o tchiasūgaa, tci-indzāsu lhagka'susūsu q'oowesi'ōgkimee.

⁷ Ikhisi bokhisī gkisi, ikhits'iiga' tl'unguts'i magkats'i'ōgki, khwalhei ts'ekhe hewe-qhwadtats'ikhē manawaā bikimaā piq'isē c'aangkina. Magkats'ī hewe uri ba'ei ncomoso 99so lhaaso cāts'isisōso c'aangkinaē'ōtche, haaso heso-qhwadtats'i manawaā bikimaā piq'i'ō sonatchoōso.”

Peesaa k'anqasē-adisi

⁸ Tl'eseēgki, Yesū bpaā ikha bokhi'ī, gkiagka', “Hia tametchu peesaa-gwangara hogoriwase 10wasusui' saa ts'ekhēsa k'anqasugkeei', are humbaloo na'seē koō cheemē uri itchawā nī yoō q'oowesuts'e? ⁹ Hisa q'oowei', hesu-maamaakhī nī hesu-koo'ō beebasōso haqa'ī nī ikhi bosu, gka', Magkats'i'o tchiasūgaa, tci-peesaā k'anqasē q'oowesi'ōgkimee.

¹⁰ Ikhisi bokhisī gkisi, Warangee ikhi magkats'iiga' hewe-malaigkakhē'ō, khwalhei ts'ekhe hewe-qhwadtats'ikhē manawaā bikimaā piq'isē c'aangkina.”

Dtadta hewe-nxowegkimee moogkumu cāgkwesē-adisi

¹¹ Yesū bpaā iea bo, gkiagka', “Ncemeseē ts'ekhe gkoose, makhanxogko gkisokhiwase. ¹² Nxoō ts'ooū bpaā hets'eēts'a ikha bo, Dtadta, magkaa tcina'waakhēgko se'waa. Hewe'gaa hewe-dtadtā hewe-magkaakhēga nxoogkosōsoa hiiq'a'ī.

¹³ Nqe deetcheets'i, nxooū ts'ooū bpaā hewe-magkaakhē tchiaa dlomowagkaa nī peesaāga tl'aā q'uma itaeēnaa hik'i. Hia xo'a nxeei', bpaā peesaakhē tchiaa sogkonawā dtoo. ¹⁴ Hia yoō peesaā tchiaa

dtooi', gkwaa naragu uri meea nxee hewe q'umādtanaa. Hewegki hiisii mehēsets'e. ¹⁵ Hewe'gaa ncemesee xo'ee ts'ekhex'anaa hik'i, nīgā nqwane gka' hewe-pagadzieets'igkwa. Ncemesē hewe bpa mindadtanaa khee ^a gkeudto mantchagkusanaa.

¹⁶ K'areē hewe bpa ura ts'oots'isi, bpa gkeudtoa mantchawats'ē dtangakhē mantcha'ōts'igkia sona! Bpa tcūsi' ncemesee mehē mantchats'e ieesēgki tchee.

¹⁷ Hia dzigidadtanaa gkwesegayooi', bpa gka', Tci-dtadta-pagadzi hanesoaa neē mantchā ni'ā x'andtamē dtigkina, sii tci o iē ts'oots'i'ī tlaasi! ¹⁸ Swesi' tci-dtadtax'ana kwaasi, nī ikhi bogkweesi, Dtadta, Warangeenasi qhwadtats'i nī habpunagkisi. ¹⁹ Habpuxosi tl'eseē haqasats'igki lhawegkaatchee. Hewegkimee habpu-pagadzieesikhe'gko ncwese.

²⁰ Hewe'gaa o'tchea haangā hets'eēx'anaa kwaa. Xookhi beebasitcheets'i, hewe-dtadtā bpa itanaa cāgeē ura moogkumua cāgkwe. Bpa ts'ok'ia hewenxowēx'anaa ta nīgā gkunduts'ē humbamee. ²¹ Nxoō bpa ikha bo hets'eēgkimee, Dtadta, Warangeenasi qhwadtats'i nī habpunagkisi. Habpuxosi tl'eseē haqasats'igki lhawegkaatchee.

²² Bpa tcūsi' hewe-dtadtā bpa hewe-pagadzīsots'a ikha bo, gka', Gitl'e lhaweteegkwe lhibedtena nogkaa nigkwē nxeesugkeegkwe. Pedteggkwe tl'ūnaee iee nī tl'ak'imegki xhadtana'waa i'waa! ²³ Dama tchāgkitesūsugkwe nogkaasū tl'itee, oo sigkugku

^a **15:15 gkeudto.** Wayahudigkimee gkeudtō khwalhoo.

ncu'waa ni'õ magkats'i, ²⁴ heeu tci-nxowẽ udtaa tlaasiakhe', swesi' tl'eseẽga c'ee'õgkimee, udtaasi' k'anqaa bpaa swesi' q'oots'a. Hewe'ga' tchiasoaa magkats'i'õga baaraa ondte mantcha'ã, ts'eẽ ni'ã x'ia.

²⁵ Hiisii nxooũ ba'esẽ mindadtaa ie. Hia kwaã koo'õga beebasii', bpaa goma imẽ nĩ chimea ke'e. ²⁶ Bpaa pagadzies ts'ekhea haqã xagkats'ae, gkiagka', Hotcoosi'na ts'aagku? ²⁷ Pagadzieẽ bpaa ikha bo, Habpu-nuunuũgaa kwaa, bpaa habpu-dtadtaa dama tchãgkitesua tl'iteegkwe, hewe-nxowẽga tl'eseẽ lhaaũ nĩ c'eesea q'oowe'õgkimeea. ²⁸ Nxooũ ba'esẽ bpaa k'itl'e, nĩgã koonaa nxee'õts'igkia isi. Hewe-dtadtã bpaa dzakanaa dtũ nĩgã ura nqwanee gka' koonagkwa nxee.

²⁹ Hewesi' bpaa hewe-dtadtãga ikha bogkwee, C'eegkwaa, maagka deeteesi iẽ ya'abekhibpowa, nĩ habpaa bowats'ekhẽts'i ts'ekhenagki isisisits'e. Bpaa tcisi' da'ameegki seesibpots'e tci-wa'amakhigkisũ sigkugku ncu'waasagkimee! ³⁰ Heeu habpu-nxowẽsi' habpu-magkaa kindii x'a'waa'ĩ x'uwãgkiwagkaasẽ hia dtakhi cii', bpii dama tchãgkitesui tl'iteegkwe.

³¹ Hewe-dtadtã bpaa ikha bogkwee, Tci-nxobpo, oo habpukhisũgaa neewa nqetchia, nĩ magkaã tcix'akhẽgki tchia habpu'wai. ³² Sigkugku ncu'waã ts'ekhe'ts'i magkats'isats'isi' lhawegkaagaa, heeu habpu-nuunuũ udtaasi' tlaasia'õgkimee nĩ swesi' tl'eseẽga c'ee, udtaasi' k'anqaa nĩ swesi' q'oots'a.”

Magkaa-c'eei makheteē-adisi

16 ¹ Yesū bpaā hewe-x'aaisōsoa ikha bokhi'ī, "Benegee ts'ekhe gkoose, magkaa-c'eeise. Aa ncomosoa benegeēgkimeea' bo, gka' hewe-magkaa-c'eeiā magkaakhēts'a sogkona. ² Hewe'gaa benegeē magkaa-c'eeiāga haqaā ikha xagkats'ae, Heekhwe khawateekhē tcaa habpu c'aangkinasi ke'ewats'ekhē hotcoo? Hiisigkwaā bokhise tci-magkaakhē higkikhe'i ya'abewagkaa, tci-magkaa-c'eeiāts'ibpots'e iē gkoo.

³ Hewe magkaa-c'eeiā bpaā xagkats'awats'i, Swesi'na higki ncweesi? Tci-benegeē tci-ya'abōdtatche ts'ok'isesei. Sambogki tlaagkise lhome'ī, nī nqwanē ma'ēgki muresi cāgee. ⁴ Swesi' hia heeu ya'abōga ts'ok'isesei', tci ncweets'ē manaasi, aa ncomosoa heso-ts'aana gkulalisese.

⁵ Hewe'gaa hewe-benegeēna dagewasisōso tchiasoa ts'ekhitsu'ekhisoa haqa'ī. Bpaā baarasats'iēga xagkats'ae, gkiagka', Tci-benegeēx'a'na dage ha'amgkeesibpo?

⁶ Bpaā ikha bogkwee, Tci-dagē mizeituni-tchā-debe 150ga'. Magkaa-c'eeiā bpaā ikha bo, Egko heeu karatasī habpu-dagesē, nigkō haagkits'ī habpu-dagē piq'isē debe 75 andigkaa.

⁷ Bpaā dagesē dtēts'igkia xagkats'a, gkiagka', Habpu-dagēna ha'amgkee? Bpaā ikha bogkwee, Ngano-dzunia 100ga'. Magkaa-c'eeiā bpaā gka', Egko heeu karatasī habpu-dagesē, nigkō piq'isē dzunia 80 andigkaa.

⁸ Bpaa benegeẽ haau magkaa-c'eeiã khateẽga halisee, hewe-makhoõgkimeea.”

Yesũ bpaa iea somasugku gkiagka', "Araasi' q'umadta-ncomoso makhewateeso wa'amakhigki i'wãgkidta, ^a bpaangki-ncomosõ'õtche. ⁹ Tcigki ikhisi bokhisĩ, sĩ-magkaakhẽ'ĩgkwe maamaa itcha o q'umadta, hia magkaã s'ix'a'khẽgaa tcheegkiwai', aa labanaẽ qwaa'õna lhaa c'wakhe'sĩ.

¹⁰ Ncemesee magkaa ts'oots'o' lhaa amesẽ, me'waadtagki lhaa ncweei. Ncemesee magkaa ts'oots'o' kha amesẽ, me'waadtagki kha ncweei. ¹¹ Hia magkaa o q'umadta s'igedtõ lhaa ametchĩgi', hewets'isi' daats'iits'e Warangee araa-benegets'ĩ s'igesats'i. ¹² Nĩ hia dte-magkaa ame'õdta lhaa ncweetchĩgi', ho magkaa s'inaẽ s'igeiãwa'?

¹³ Pagadzíee ts'ekhegki tlaagki benegee gkisosogkimee ya'abesats'i daaiã, ts'ekhẽ nqats'eẽ nĩ dtẽ meenaai'õgkimee au ts'ekhẽ lhaa ya'abegkwẽ nĩ dtẽ tl'eei. Warangeẽ nĩ magkaagkimee ts'ekhe'ts'i ya'abesats'i daats'iits'e.”

Bo Farisayõso c'aangkinakhẽ

¹⁴ Farisayõso hia' hewekhe Yesu-bokhẽts'a ke'ei' aa tl'ee'ĩga' nqeenqawaa, ura' peesaa' meenawaa'õgkimee. ¹⁵ Yesũ bpaa ikha bokhi'ĩ, "Sĩ lhaa'wasĩge ncwencwets'i ncomoso-cweena, bpaa

^a **16:8 bpaangki-ncomoso.** Nqekhẽ hewekhedta dini-gumbe dtegi gkoose Farisayokhe', heso Esseneso. Heeso bpaangki-ncomosoa' haqats'i. Dime Yesũ hesodtanaẽts'a sayo.

Warangeesi' manawaa sī-dzigidadtakhē. Nī ncomosoaa magkaā ura' manawasea' ca'waā dtaangkia' gkaakhē, Warangeesi' ura nqats'iwaa.

¹⁶Yohana Badtizaiā-nqekhē'ōna, Musa-sheriā nī Warangee-xuma'wai-andigkookhēts'i boa'.

O'tchesāts'i, bo lhaaū Warangee-ba'ooiāts'i boa'.

^aSambo'īga bots'i, aa ncomoso tchiaso nxeeso. ¹⁷Bpaa ikhigkisi', sheriā xookhi hewe-sambō k'anqaseetchee.

Tl'ungū nī q'uma c'udtugkuwa'ō ura moola, sheria-andigkoo ts'ekhe ts'oo'dto dtedtegkuts'i'ōtche.

¹⁸Ncemese hia ncumusua wagkeesū tametchu dtesua siesui', wamoogki-qhwadtats'a ncu'waa. Nī haau tametchu wagkeedtosu siesēgki', wamoogki-qhwadtats'a ncu'waa."

Ncomoso Warangee-sheriakhi'a' x'aa mutuguts'i adugkuiā


¹⁹Yesū bpaa adisia boowekhi'ī, gka', "Benegee ts'ekhe gkoose, nqetchia mantcha deetee ncuweē nī gitl'e lhaa'wa uri hogoriwasiteea hic'awa. ²⁰Nī o' benegeē-koo-dtanga'āts'i, ncemese gkoose mutugee, xwā heweiā Lazari. Lazarī o'a nxinewa nī ncī heweiā tchia c'waa dtidtee, ²¹aa gkaagkaa ncadtimeē hewe-c'waakhēts'a' maq'o. Lazarī ura sonamsets'i benegeē-mezatche mantcha qhoosekhēts'i mantchā x'andta'ō.

²²Yoo Lazarī bpaa tcheets'i, aa malaigkaa tl'unguna' sie, Abrahamuaa ie'ōna'. Hiingo benegeēgki bpaa

^a **16:16** Qwaā hewets'i hinso ikha' dtorimse gka', Ncomoso tchiaso sambo'īga' lhilhighkē nxee.

tcheets'i, aa lhagka'see.

²³ Benegeë hia mak'oo uri
ba'ewateedtaa iei',
Warangee'õ
pank'e'ĩdtosõso-
q'waãdta, bpa
c'aangkinaa c'ee nĩgã
Abrahamua itanaa cãgee
nĩ Lazarĩgki hewe beebaa
ie.



*Lazarĩ tl'unguts'i nĩ
benegeë x'ĩdta*

²⁴ Hewe'gaa benegeë
rõga c'ãgkweë
Abrahamũts'a haqa,
gkiagka', Dtadta

Abrahamu! Moogkumugko cãkhise, nigkõ Lazari
kinsee tcix'ana, bpa ts'wa'a ts'adtana ts'a'seë qhëna
dtoosee'tche gkwaa x'õgaa ts'a', urisi ië mak'e gkoo
heeu x'ĩdta.

²⁵ Abrahamũsi' bpa ikha bogkwee, Nxooipo,
hiisigkwaa gotl'okhi habpu-dturudtadta habpu-
magkaa lhaa'wai q'oo'waa'õts'i, nĩ Lazarĩ khawateea
q'oo'waa. Hewesi' swe oa ië q'wagkuwats'i, habpugki
bp̄ii gkumu ba'ewateedtai ie. ²⁶ Nĩ hewekhe'õtche,
sũgaa nee'õ nĩ sĩgaa nee'õ, gkadte q'wa uri cimetea'
bpee. Q'wã hewe bpee'õts'isi', haaso ondtetcho
s'ĩdtena ncađti'õ sonasisõso aa mee daa, nĩ haaso
xo'tcho sũ'dtena ncađti'õ sonasisõsogki aa remats'iso.

²⁷ Benegeë hewe bpa ikha bo, Swesi' dtadta,
nqwaneposi gkoo Lazari kinsee tci-dtadta-ts'aana.

²⁸ Bpa hik'ĩ tci-toots'eekhi gkwa'anasõso bokhi'ĩ aa


heso-kha'ōkhē bikimaā mee ondtana ncaḁti mak'oo ba'ewateekhēdtana. ²⁹ Abrahamūsi' bpaa ikha bo, Musā nī Warangee-xuma'waiaa andigkaawakhē bō neesewasiso, hewekhets'ikhi'a' ke'e.

³⁰ Benegeēgki bpaa gka', A'a, dtadta Abrahamu, tcūsi' ncemesee tlaasiwaseaa neewa'dtetchaaa kwaā hik'ī bokhi'īwa', heso-qhwadtats'ikhē manawaā bikimaā piq'iso.

³¹ Abrahamū bpaa ikha bogkwee, Heso habpu-toots'eekhīso hia Musā nī Warangee-xuma'wai-andigkookhēts'i ke'etchooi', anka c'wa'sots'e ncemesee tlaasiwase'dtetchaaa c'eē hik'ī bokhi'īgkeewa'."

Meegkwe qhwadtats'i dteegkwāgki

17 ¹ Yesū bpaa hewe-x'aaisōsots'a ikha bo, "X'weex'we ncomoso qhwadtats'idtana tl'atase'īgikhē neesets'ii dtakhi. Bpaa tcūsi', hewena cāgi ncemesee hewekhets'i nowagkasē. ² A'ee ncemesē hewe nowe'ī dī



Wayahudi-nowe'ī dī

ceegkasea' k'wēna'
hic'aats'ē baharidtana'
xeewa' lhaau,
aarets'isisōsodtatche
qhwadtats'isugkee'ōtche.

³ Hewegkimee c'eegkats'igkwe. Habpu-wa'amee



Tametchiaa neē dīts'a' nowe

areets'isēgaa hia qhwadtaa'bpoi', haimsegko, nī hia hewe-qhwadtats'īga manaã bikeē piq'ii', meegko qhwadtats'i dteeyegkwe. ⁴ Anka nqe ts'ekhe 7wanagkeea qhwadtats'i'bpowa', hia habpux'anaa kwaakwaã gkiagka', tci-qhwadtats'ī manaasi, bikeē piq'isi, meegko qhwadtats'i dteeyegkwe."

⁵ Mitumēso aa Yesūts'a' ikha' bo, "Sū-aarets'īgkwa q'okonaakhisū."

⁶ Yesū bpaa ikha bokhi'ī, "A'ee aarets'i ^ats'oo'dto dteedtera uri ts'oots'o'ōmgkeesisīwa', heeu sak'ana-teēts'igkiwa' bosī gkiegka', Tl'akuts'igkō baharidta nxūgkuts'iwa', teē k'omei.

Pagadziee hewe-ba'eseaa bowats'ēts'igkwa ncwee

⁷ Swe ikho' bo, sīdta ncemesee pagadzieese, lhomeã au indzaa baloo. Hia ts'anaa kwaã cii', hewe-benegeē hiisii dtidtee ikhiwa' boine gka', Cigko mantchana?

⁸ Ankagki! Ikhi boi gka', Mantchagko ncu'waakhise nigkō o iē tcits'i adugku, tcaa iē mantchā ts'eesi'. Hisi tlemsei', bpii habpugkiaa mantchaa ts'ee. ⁹ Pagadziee hia hewe-benegeea bowats'ekhēga ncuncu'waai', benegeē hinamseine ncuncu'waagkwe'ōgkimee? Hinamseits'e!

¹⁰ Ikhiga' sīgki, hie bo'waakhisīdtkhē tchiaie ncuncu'waai', ikhigkwe bo gkiegka', Sū pagadzisū dtakhi, sū ncweewats'ekhēts'o ncwee."

^a 17:6 Qwaã hewets'i Girikigki'ī ikha' andigkaa gka', *Haradali-dteedtera*. Haradalī tee mee dteedtera uri ts'oots'o'wasē.

Warangee-ncomoso hinamsegkwekhi'a'

¹¹ Yesūgaa iē Yerusalemunaa hik'isi', bpaā Samariā nī Galilaya-qwaa-digima'īga c'udtugku. ¹² Hia gkidzidzi ts'ekhedtanaa nxeei', bpaā makha mabuubawase 10a q'oo'waa. Heso mabuubawasisōso aa Yesū ita'a lhee, ¹³ ni'ā rōga' c'āgkumaā gka', "Yesu, Ba'esibpōbpo, moogkumugko cākhisū!"

¹⁴ Yesū bpaā ca'waa'īgō ikha bokhi'ī, "Ni'gkwē kuhanīso'ō lade'sugkuts'i." Aa haanga. Hia' neē ni'i', xoots'isi' aa bpoona.

¹⁵ Hesodtatche ts'ekhe hia cā bpaā bpoonai', o' dtidtee bpaā Yesūx'anaa kwaa ci, rōga c'āgkweē Warangeets'a halimsē. ¹⁶ Hia cī nxeei', bpaā Yesū'ōga gkudtumdeaa hoq'ōga q'umanaa dzaasugkeē hinamsegkwe. Hewe ncemeseē Samariatche.

¹⁷ Yesū bpaā ikha bo, "Isi ncomoso 10geeyooi' bpona'ī korok'ose'īdtosōso. Hinsōso 9sōsosi' hagkua' ni'?" ¹⁸ Hinso tcheesone Warangeets'i halimsesana kwaā nca dtisisōso, heeu waginē dtidteene dtakhi'?"

¹⁹ Hewe'gaa Yesū ikha bogkwee, gkiagka', "Haangagkō hik'i, habpu-aarets'īgaa bponabpo."

Warangee-ba'oo-ci'ō

²⁰ Nqe ts'ekhe, Farisayōso aa Yesūga' ikha' xagkats'ae, gkia'gka', "Warangee-ba'oōna ha'su cii?" Yesū bpaā ikha bokhi'ī, "Warangee-ba'oo cwee'ī cāts'isēkhe' ciits'e. ²¹ Nī ikhi bosots'e gka', C'eegkwe, nengo o, haa ikhi bosots'e gka', C'eegkwe, nango het'i! Ke'egkwe, Warangee-ba'oō sī gkadtea ie."

²² Yesū bpaā hewe-x'aaisōsoa ikha bokhi'ī, "Nqe ncaadia neē uri sonasī Ncemeseē-Nxosīsi-nqekhēdtatche ts'ekhēgkiwa' cā'ōts'i, gkwaa tcūsi' cāsīts'e. ²³ Ncomoso ikhi bokhisīso gka', Hetl'inagkwe c'ee! Nī gka', Onagkwe c'ee! Bpaā tcūsi', meegkwe sīgaa nee'ōtchī tchegkeri haa meegkwe x'aa'ī.

²⁴ Magkawa' tci Ncemeseē-Nxosīsaa kwaasi', ts'ekhenasāts'i cisi nī hembets'i cāts'isi miix'aa cī nīgā tchia'dtenaa tl'unguts'a xomekhe'. ²⁵ Bpaā tcūsi', dtanā Warangeēgaa tci Ncemeseē-Nxosīsinaa gwesegawaakhe', nqekhēdta-ncomosōso uri kha ncweseso nī wagkeseso.

²⁶ Udaa Noa-nqekhēdtaa xhēgkuua ts'ekhenasāts'a cits'i'īkhe', ikhits'iiga' tci Ncemeseē-Nxosīsaa cits'ē nqēts'igki. ²⁷ Noa-nqekhēdta, ncomoso mantcha'ā ts'eē nī'ā hedtegwāgki Noāgaa safinadtanaa nxeets'ē nqēna'. O' bpaā ts'a ba'eteeaa cī nīgā heso tchiasoa dto'ī.

²⁸ Loti-nqekhēdtagki udaa ikha ncwets'i, ncomoso mantcha'ā ts'eewa, dlomo'ā dlomosugkuwa, lhome'ā nī koogkia' tlinewa. ²⁹ Bpaā tcūsi', nqē haau udaa Lotiaa Sodomatcheaa dtusi', gkwaa x'ī uri hix'iwateeaa x'oo tl'ungutcheaa nīgā gkidta'sōso tchiasoa dto'ī.

³⁰ Ikhits'iiga' tci Ncemeseē-Nxosīsi cāts'its'ē nqēts'igki. ³¹ Nqē hewets'i, ncemeseē hia hewe-koo-gkumbu c'aangkia iei' gkwaa hewe-magkaakhēgaa koodtaa neei', meegkwa x'oosana x'agki, nī ncemeseē hia mindadtaa iei', hewegki meegkwa ts'aana kwaa magkaa x'oosana, tleeseagkwa ie bikimaa'ōts'i.

³² Hiisigkwe gotl'okhi haau ^a Loti-ncumusū q'oowesēts'i. ³³ Ncemesee dturudta q'umadtakhē bpona'waa sonasē, lhagka'amseei labanakhē. Nī ncemesee dturudta q'umadtakhē k'aq'asugkuwaasē, labana iē iewai.

³⁴ Ikhisi bokhisī gkisigka', tci cits'ē dtweēts'i ncomoso gkisoso ts'ade ts'ekhets'i q'asī neeso, Warangee ts'ekhē siei nī dtē bikeei. ³⁵ Nqē hewets'i tametchi gkisoso gkunu ts'ekhets'i neē c'ameso, Warangee ts'ekhisūsu siesui nī dtesūsu bikeesui.

³⁶ Makha gkisoso mindadta neē ya'abeso, ts'ekhē siei nī dtē bikeei.”

³⁷ Hewe-x'aaisōso aa xagkats'aeē gkia'gka', “Ba'esibpo, hewekhena hagku ncwencwets'iwai?” Bpaa ikha bo, “Gweresi tcuuaa tlaasī dzikhe'ōna' kiki'sēgkiwa.”

Nqwanegkwe mee ma'wā bikeē

18 ¹ Yesū bpaa hewe-x'aaisōsogkimeea nqwane'ōdtanaēts'a adisia boowe, gka', nqwanewakhi'a' mee ma'wā bikeē. ² Bpaa ikha bokhi'ī, “Mji ts'ekhedta xhēgku-dtugkuisi'. Hewe Warangeets'i ncoosets'e hakhi ncomosots'igki c'wa'sets'e. ³ Nī xo' hewe mjīdta, mehembesugki ts'ekhisu gkoosusu. Hesu hiai' xhēgku-dtugkuiāx'anasa hik'iwā nqwanemsets'i,

^a **17:32** Warangee Loti-ncumusūsu ura xhēgku ba'eteeā ieesu, ncemesūsu hesu Sodomana kwaa'ōts'isa sona'ōgkimee, mji Warangeeāā xhēgkueē nīgā dtooiādtana. Baarasats'i 19:26.

ikhisa bõ gka', Tcigkimee khasekhisũ bõgko nceẽ tcinaẽ ncu'waa'tche.

⁴ Nqe deetee hewe xhëgku-dtugkuiã iẽ isi, mehembesũsu mehẽ adugkeesu'õts'i. Yoo dtaangkinasi', bpaã ikha gkwesega, Tci Warangeets'i ncoosisits'e hakhi ncomosots'igki c'wa'watchee. ⁵ Bpaã tcũsi', heesu mehembesũsu cimesã sogkona'õgkimee, swesi' heeu bõ ncee'e ni'ẽ hesunaẽ ncu'waats'e, saa mee cimẽ tcits'i ma'sugku!"

⁶ Yesũ bpaã iea bo, "Ke'egkwe heeu xhëgku-dtugkuiã khateẽgaa bokhe'. ⁷ Dtelha dtakhi, Warangee hesona'waãts'i ncweeiga' ncomoso heweaa malhe'isõsona, dtweẽ nĩ k'imeedte k'eegkwesisõso. Chiits'e adugku'isats'i. ⁸ Ikhisi bokhisĩ gkisigka', adugku'ĩ nĩ lhibedtena hesonaẽ ncu'waats'i'ĩgi. Bpaã tcũsi', tci Ncemesee-Nxosĩsaa q'umadtanasi kwaasi', xookhine ncomoso aarets'iwase q'oo'waasi?"

Farisayoeẽ nĩ kodi-xhëgkui-adisi

⁹ Tl'eseẽgki Yesũ adisia boowe haaso Warangee'õ lhaaso cãts'ĩ nĩ hinsots'i tl'eetl'esisõsogkimeea, gka',

¹⁰ "Ncomoso gkisoso neesiso, Warangeegkimee pumpusets'ẽ koõ'dtena' salasana' ni'. Ts'ekhẽ Farisayoe, nĩ dtëgki kodi-xhëgkui.

¹¹ Hewe Farisayoeẽ bpaã nxumẽ nĩgã hewena'waãts'a sala, gkiagka', Hoogko Warangeebpo, hinamsesi tci khateesits'e'õgkimee hinsõsokhe', isa'wã, dadaa'wasisõsõ, kindits'iwasẽ haa heeu kodi-xhëgku'ĩ lhak'asets'e! ¹² Nqe 7dta, gkisowanasi

mantcha hok'ots'i nisĩ tcaa q'oo'wats'ekhẽ tchiadta, gkomudta ts'ekhesi dtugku.

¹³ Haau kodi-xhẽgkuĩsi', bpaá dlo'ia nxume. Tl'ungunagki c'eetchee nĩgã hirira'ĩga sagkaa tl'apẽ ikha bo, Warangeebpo, moogkumugko cãkhise tci khwalheisĩsi!"

¹⁴ Hewe'gaa Yesũ ikha bo, "Ikhisi bokhisĩ gkisigka', hewe ncemeseẽgaa ts'aanaa kwaasi', Warangee'õ lhaaua cãts'i. Haau Farisayoeẽsi', ankagki! Ncemesee ba'ese ncwets'isẽ, Warangee x'agkugkeei'õgkimee nĩ x'agkugkuts'isẽ, Warangee gkongo'seei."

Yesũ nxoogko ts'oots'o' c'aangkinaa lhaa'waa bo'waa

¹⁵ Dtets'i, ncomoso aa nxoogko ts'oots'o'gkia' Yesũx'ana' nowagkaa, bpaá dzaats'i'ĩ nĩ lhaa'wa bo'waats'i'ĩgi heso c'aangkina. Hewe-x'aaisõso hia' ikha' cãgi', aa habaisõsoa' q'akhawats'i'ĩ. ¹⁶ Yesũsi' bpaá nxoogkõsoa hewex'anaa haqa'ĩ ikha bõ gkiagka', "Bike'ĩgkwe nxoogko ts'oots'o' aa tcix'ana ncaadi, meegkwe x'a'se'ĩ, ncomoso heeso nxoogkõso lhak'asõso heso gkwee Warangee-ba'oo-ncomosõso.

¹⁷ Araasi dtakhi bokhisĩ, ncemesee Warangee-ba'oogkwa meenaa nigkwã hewena didi'sets'i nxoogkoaa heso-habaisoa' meena'ĩ ni'ã hesona' didi'sets'ikhe'. Hia ikhi ncweetcheei', Warangee koraaits'e hewe-ba'ooodtana."

Benegee Warangee-ba'oodtana nxee'õ nqank'oa

¹⁸ Ba'ese ts'ekhe, bpaá Yesũts'a xagkats'a gka', "Mwalimu lhaabpõbpo, hotcoo ncweẽ nĩ xhẽgku nqẽts'i labana ie'õ q'oowesina?"

¹⁹ Yesũ bpaá ikha bogkwee, "Hotcoogkimeei tcits'i lhaasi haqa? Ncemesee lhaau tlaagkiga', Warangee ts'ekhe dtidtee dtakhi! ²⁰ Habpu manawaai Warangee-sheriã, † Meegko kindits'oo ncwee, meegko k'wee, meegko isa, meegko faroo bo, habpu-dtadtã nĩ habpu-ioõkhi manawasisogko ca'ĩ ke'ekhi'ĩwa."

²¹ Bpaá ikha bogkwee, "Ts'oo'dtosisãts'i sheriã hewekhe tchiasi x'a'waa."

²² Yesũ hia ikha ke'ei', bpaá gka', "Xookhi bo ts'ekhei k'waamats'i. Hik'igkõ habpux'a'khẽ magkaã tchia dlomowagkaa nigkõ peesaã mutugu hiiq'awaa, habpugki tl'unguts'i magkaasibpots'ibpo. Hii tlemsei', gkwii cia x'aase." ²³ Hia ikha ke'ei', bpaá ura dzigidaa gkumuts'ee magkaa uri deeteewase'õgkimee.

²⁴ Yesũ hia cã bpaá dzigidaa ura gkumuts'eei', bpaá gka', "Ura nqank'o benegee Warangee-ba'oodtana nxee'õ! ²⁵ Uri moolase ngamia sindaano-qhwee'ĩ c'udtugku'õ, benegee Warangee-ba'oodtana nxee'õtche!"

²⁶ Ncomosõso hewekhets'i ke'esisõso, aa gka', "Swesi' hia gkwaa ikhii', daats'iits'ege ncemesee ts'ekhegki bpoonasats'i."

²⁷ Yesũ bpaá ikha bokhi'ĩ, "Ncomosox'a' remagkwawasẽ, Warangeex'a' daats'iwai."

† 18:20 Kutoka 20:12-16 nĩ Kumbukumbu 5:16-20

²⁸ O' bpaā Petroāā ikha bo, "Nī sūna? Sū-magkaa tchiageo bikimaā habpuo x'aabpoyooi!"

²⁹ Yesū bpaā ikha bokhi'ī, "Araasi bokhisī, hia ncemesee Warangee-ba'oogkimeea hewe-kooa bikeē, hewe-ncumusū, hewe-dogō, hewets'i habaisō au hewe-nxogkoi', ³⁰ deetee q'oo'waai heweaa bikimaakhē'ōtche xookhia o q'umadtaa iesi'. Tleseēgki, labana ie'ō q'oowei laba q'uma xaeēdta."

**Yesū swamgkiēts'a xuma hewe-tlaasī nī
c'ee'ōdtanaēts'a**

³¹ Yesū bpaā hewe-x'aaisōso 12sōsoa bpeeranaa dtedtegku'ī, nīgā ikha bokhi'ī, "Ke'ekhisegkwe! Yerusalemunao nī'. Nī xo'si' tchia ncwencwets'iwai, Warangee-xuma'waiāā tci Ncemesee-Nxosīsidtanaēts'a' andigkawaakhē.

³² Wayahudits'esōso-tl'ūdtana bpeeseso, aa tl'eesē, hamamesē nī tuk'aso tcina. ³³ Tl'apumeseso q'we'ī nī wak'aseso, bpaā tcūsi' nqe swamgkiēts'i c'eesi."

³⁴ Hewekhe bō Yesuaa hewe-x'aaisōsonaa bowats'ē, doologki dtoots'i'ītchee, bokhē hembets'i neetchee'ōgkimee hesona. Nī mehēgki manatchoo hotcooa bo'ōgki.

C'eesets'eaā aarets'i Yesū Warangee-Masiya'ōts'a

³⁵ Yesū hia iē Yeriko-mjidtaa beebasii', o' xoo-xharāts'i c'eesets'e gkoose. Hewe o'a haagkits'imsets'ī nīgā ncomosots'a adugkee'ōga nqwanewa. ³⁶ Hia ke'e aa ncomoso deeteesoāā o'a' neē c'udtugkui', bpaā

xagkats'a, "Hotcoosi'na?" ³⁷ Aa ikha' bogkwee, "Yesu Nazaretits'iēgaa c'udtugku."

³⁸ O'si' bpaa rōga c'āgkweē gka', "Yesuee, ^a Daudi-Nxobpōbpo, moogkumugko cākhise!" ³⁹ Ncomoso dtaangki lheesisōso aa q'akhawats'ee, gka' qhamugkwa. Hewesi' bpaa dtelhaa rōga c'āgkweē gka', "Daudi-Nxobpo, moogkumugko cākhise!"

⁴⁰ Yesū bpaa nxume, nīgā bo gka' nogkaakhi'a' c'eesets'ē hewex'ana. Hia iē beebasii', Yesū bpaa xagkats'ae, ⁴¹ "Hotcoo ncu'waa'bpo'ōgi sona?" Bpaa gka', "Ba'esibpo, nqwanesi gwaa tci-cweēgaa tl'eseē c'eeva." ⁴² Yesū bpaa ikha bogkwee, "C'eegkwaa! Habpu-aarets'īgaa bponabpo." ⁴³ Ts'ekhenasāts'i bpaa tl'eseea c'ee, nīgā Yesū x'aa'ōga baaraa Warangeets'a halimsē. Ncomoso tchiaso hewekhe ca'waasisōso, aa hesogkiaa Warangeets'a' halimse.

Yesū Zakayo khwalheīga bponaee

19 ¹ Yesū bpaa Yerikots'a nxee, nīgā mjidtaa iē c'udtugku. ² Xo' kodi-xhēgkuisisōso ba'ewasisōsodtatche gkoose, xwā heweiā Zakayo, nī heeugki benegee. ³ Zakayō Yesū cāsagkimeea higki lhak'ee ncemesee'ō, bpaa daatchee cā'ōts'i ncomoso

^a **18:38** Daudī Israeli-nxagko-mfalme gkisokhiēga', maagka 1,000 xookhi Yesu habats'itcheets'i. Warangeē Daudigkimeea bo gka', hewe-ba'oo tcheegkinaeets'e labana (2 Samweli 7:16). Yesū Daudī hewe-haboodtaa habats'i (Mathayo 1:1). Hewegkimee, Yesū dtelha Daudi-nxowets'e, bpaa tcūsi' Wayahudīso ikha' haqa gka' **Daudi-nxowe** hiingo Warangeeaa bo gka' kinseeiāts'a' Wayahudi komoria'īsagkimeē, magkawa' Masiyā (Kristū).

dee'ōgkimee nī hewegki tuungkatee. ⁴ Hewe'gaa ncomosōso dtaangkiaa tā sak'ana-tee xoo-xharāts'iēnaa gke, nī Yesū cāgi hewe xoo'ī c'udtugkui'ōgkimee.

⁵ Yesū hia o'a nxeei', bpaā c'aangkinaa c'ee, nīgā ikha bo, "Zakayo, lhibedtenagko x'agki! Nqēts'i habpunts'aana waginits'isats'isi lhawegkaa gkoo."

⁶ Zakayō bpaā lhibedtenaa x'agki, nī magkats'i'īga Yesūga hewe-ts'aanaa khee.

⁷ Ncomoso hewekhe ca'waasisōso, aa tchiasoaa biawasi nīga'ā ikha' bo, "Khwalhei-ts'aanagea isi waginits'i."

⁸ Zakayōsi' bpaā nxumē Yesūts'a ikha bo, "Ke'egkwaa ba'esibpo! Tci-magkaakhēdtatthe gkadte nceē nī mutugu i'wa'īsi. Nī ncemesee'ā'nesile' dada'oo'īsi siei', hagkawana kwamseegkwesi tcaa sieiāna."

⁹ Yesū bpaā ikha bogkwee, "Nqēts'i, bpona'ō habpukoonaa ci, habpugki Abrahamu-haboobpo. ¹⁰ Tci, Ncemesee-Nxosīsi ncomoso k'anqawasēts'i itchā bponasanasi ci'ōgkimee."

Lhaagkwe nwee, mfalme kwaai gkwee!

¹¹ Ncomosōso hia' xookhia' neē hewekhe bōts'a' ke'ei', Yesū bpaā q'okonaā adisi ts'ekhea bokhi'ī. Yerusalemut's'a beebasi'ōgkimee, ncomosōso ikha' neē gkwesega gka', Warangee-ba'oō hiisii beebana cii.

¹² Hewe'gaa ikha bo, "Ncemesee ts'ekhe gkoose, falme-boyodtatthe. Ncemesē hewe bpaā q'uma

itaenaa haangã hik'i, aa ba'oo ieeso. Hia xo'tcheaa kwaai' bpa hewe-q'umadtana mfalmets'ii.

¹³ Xookhi haangatcheets'i, bpa hewe-pagadzikhēdtatchea 10a haqawaã peesaa deetee hiiq'aĩ heso tchiasoa, aa c'eewagkaagkweso, nĩ ikha bokhi'ĩ gka', Biasharagkwe ncweekhise gkwaa habats'i tci kwaa'õna. ¹⁴ Bpa tcūsi' ncomoso hewe-q'umāts'isōso nqats'eea', hewe'ga' ncomosoa' kisimsee aa x'aã ikhi boso gka', Heu ncemeseē sūna mfalmets'i'õ meenaatchū. ¹⁵ Ikhigkisi', bpa mfalmets'ĩga q'oo. Hia xo'tcheaa kwaai', bpa haaso pagadzīso peesaa i'wa'īsōso haqā'ĩ, aa ts'ekhits'ekhi boso mfalmēgkimee, ha'amgka' habats'isugkuwaa'õ.

¹⁶ Pagadzi baarasats'iē hia cii', bpa gka', Ba'ese, tci 10wanasi habats'isugkuwaa habpaa se'waakhē c'aangkina. ¹⁷ Mfalmē hewe bpa ikha bogkwee, Lhawesugkui, habpu pagadziee lhaabpo! Magkaa ts'oots'o'dtai lhaai ncwee'ōgkimee, swesi' mji 10nasi ba'esibposi bpeebpo.

¹⁸ Pagadzieē gkisokhiēgki hia cii', bpa gka', Ba'ese, peesaã habpaa se'waakhēna, gkwa'anawanasi habats'isugkuwaa. ¹⁹ Mfalmē bpa ikha bogkwee, Habpugki ba'esibposi bpeebpo mji gkwa'ananasi.

²⁰ O'tche, bpa pagadzieē dtēgkiaa ci, bpa gka', Ba'ese, habpu-peesaã ne'wa. Lha'aruudtanasi hic'awaã lhaasi gkaa, gkwaa mee k'anqawa.

²¹ Ncobposi'ōgkimeesi ikhi ncwee, habpu khats'eteebpo sii. Habpu gkaabpookhēts'ii x'oo, nīgĩ habpu xa'waabpookhēts'igkii sosobe.

²² Mfalmē bpaā ikha bogkwee, Swesi' xhēgkubposi habpu-bokhē'ī, pagadzīee khateebpōbpo! Ikhii bo gkiigka', tci ncemesee khats'eteesi, tci gkaatcheekhēts'isi x'oo, nisī xa'watcheekhēts'igkisi sosobe. ²³ Hii ikhii manaai', hosi bpii tci-peesaā benkits'i gkaabpoo, hisi tcaa kwaai' sii hewekhena q'okonasāgkisi tl'aa.

²⁴ Hewe'gaa heso beeba neesisōsots'a gka', Tl'aagkwe hewekhe peesaā, nigkwē haau 10wana habats'isugkuwaasē neesewasē i'waa.

²⁵ Hesogki aa ikha' bogkwee, Ba'ese, heeusi' habats'isugkuwaadtō 10wasega'!

²⁶ Mfalmē bpaā gka', Ikhisi bokhisī gkisi, ncemesee hewe-tl'ūna bpeedtō lhaa ya'abegkaasē, hingegki q'okonaagkwesi. Bpaā tcūsi', hia ncemesee hewe-tl'ūna bpeedtō lhaa ya'abegkaatcheei', siets'esi hewe gkoosēgki. ²⁷ Swe, haaso tcigkimee khawasisōso, tci hesona mfalmets'i meenaatchoōsogki, onagkwe khe'ī ncaadtī nigkwē tci-cweena wak'a'ī."

Ncomoso Yesua' c'wakhe'ee mfalmekhe'a'

²⁸ Yesū hia hewekhea bo'waā q'ookai', bpaā hewe-miinzoo'īga iē hik'i Yerusalemūnaa, dtaangkia nxumē aa ncomosoa dlo'ia' x'aa. ²⁹ Hia iē Betfagē nī Betania-gkidzidzhēts'a beebasii', Mizeituni-gawa'ō, bpaā hewe-x'aaisōso gkisosoa dtaangkia kinse'ī, ³⁰ ikha bō gkiagka', "Ni'gkwe gkidzidzi dtaangkiēna. Hie neē

gkidta'nae nxeei', ^a dak'wee haangai hic'aadto q'oowesī, xookhi ncemesee gkets'eetchee. Dtaagkwě ona kheē ncadi. ³¹ Hia ncemeseeaa xagkats'a gka', Hotcoogkimee dtaadtai'? Ikhigkwe bogkwee, Ba'esegaa bo, ya'abose hewena."

³² Hewe'ga' haaso kinse'ĩdtosōso ni', ni'ā tchia' q'oo'waa Yesuaa bokhe'a'. ³³ Hesoaa neē dak'wee haangaĩts'a' dtaadtasi', aa wagondzōsoaa xagkats'a, "Hotcoogkimee hewe dak'wee haangaĩts'i neē dtaadta?" ³⁴ Aa ikha' bokhi'ĩ, "Ba'esegaa bo, ya'abose hewena."

³⁵ Aa Yesũgkimeea' dak'wee haangaĩga' nogkaagkwe, aa hewe c'aangkina' heso-gitl'ekhēga' hemewaā Yesũga' gkegkwee.

³⁶ Hia iē Yesũ hik'ii', ncomoso heso-gitl'ekhēts'a' xoōna' heme. ³⁷ Yoo bpaā Mizeituni-gawa-geengeesa'ōga nxee, Yerusalemu beeba. O' hewe x'aasisōso-gumbē meē tchia aa Warangeets'i halimsoo' baaraa meenats'i'ĩga' rōga' c'āgkumaa, ayeesugkuwasē hesoaa ca'waakhēgkimeea', ³⁸ ikha' bō gka',

[†] "Halisebpoo mfalme,
Yakhwe-xwa'ĩ cisibpōbpo!
Warangeex'a'ē putl'umāsi' t'lunguts'i
nī halisee'o Warangee Tchia C'aangkiē."

^a **19:30** C'eegko Zekaria 9:9. Andigkoō hewekhe mfalme-ci'ōts'a xumawa Yerusalemu-ncomosona, magkawa' Masiyā (Kristū).


[†] **19:38** Zaburi 118:26

³⁹ O' hewe ncomoso-gumbē meēda,
Farisayōsodtatcho aa ikha' bo, "Mwalimu, bogko
habpu x'aabposisōso aa mee hewekhets'i bo." ⁴⁰ Yesū
bpaā gka', "Ikhisi bokhisī, hia' heesoaa qhamui',
dikhēgki rō c'āgkweē dtugkeewai!"

Yesū Yerusalemugkimeea k'ee

⁴¹ Yesū hia Yerusalemuts'a beebasī mjīga cāgeeī',
bpaā k'eegkwe'ōga baaraa, ⁴² ikha bō hewe
c'aangkinaa, "Nqēts'i urisi sona a'ee habpugkiaa
putl'uma q'owe'ī xoōgi manaawa'! Bpaā swesi'
xwats'a habpu-cweets'i! ⁴³ Nqe ncaatii'ōgkimee,
habpugkimee khawasisōso kuunts'a ncu'waaso habpu-
surū nqaā'dte nī

x'a'sebpō tchiaxoo'dte
nxeewa'bposo. ⁴⁴ Nī
yoō dtelha
koko'simaakhibposo nī
habpu-ncomosōsogki
tchiaso dto'īso
gkidta'sōso. Dī
ts'ekhegki
dtigkinats'iits'e
wa'amee c'aangki,
manaabpoo'ōgkimee
Warangeeaa bponaia nogkaakhibposi'."




Kuunts'a suruna' ncu'waaia

Yesū Warangeegkimee pumpusets'ē koōga korok'osee

⁴⁵ Yesū hia Yerusalemuts'a nxeei', bpaā
Warangeegkimee pumpusets'ē koo-hado'ōdtanaa

nxee, bpa a ncomoso gkidta' neē magkaa dlomosugkuwasēts'i tl'imsooa baaraa, ⁴⁶ ikha bō gkiagka', "Andigkookhēdta Warangee ikha bo, †Tci-koō sala-koots'iiga'. †Sīsī' isaisosī, bpee sī-xhōkhe'e ncu'waa!"


⁴⁷ Nqetchia Yesū bpa a o' Warangee-koo-hado'ōdtaa ncomosoa somasugkuwa. Kuhani ba'ewasē, sheria-mwalimūso nī Wayahudidta di'seēso wak'aasagkimee xooa' itcha, ⁴⁸ bpa a higki ncweeso'ōgaa rema'ī, ncomoso tchiasoaa hewe-bokhēts'i ke'e'ōga' meenaa'ōgkimee.



Warangeegkimee pumusetse'ē koō


† 19:46 Isaya 56:7

† 19:46 Yeremia 7:11



Warangeegkimee pumpusets'ē koō

- 1 Warangeegkimee qwaa
- 2 Ubani ts'uk'ats'e pumpuso-qwaa
- 3 Pumpuso-qwaa
- 4 Tametchi-hado'
- 5 Wayahudits'esōso-hado'
- 6 Solomoni-mirangoo
- 7 Mirangookhē



Lukasi

